

1 TIMOTI

Rau Yo Paulu Iwode Pang Timoti I, In Atu Ki

1 ¹Au Paulu yo aposol ke Yesu Kirisi i, in la awodo rau naii pong Timoti i. Ngan ye betanga medana ke Maro, tool yo be ipamulidi ye so dook tiap yo be igarungidi i, in iye Yesu Kirisi, tool yo tatara lodo le atu panga be ilonidi i, in yaru la titarau be ayei urata i nga. ²Ngan rau i awode pong Timoti. Ong in ye lom medana yo kutaru pang Maro i, in le dawa ben au natuk moolmool nga. Nen le apatarau pang Tamada Maro iye Yesu Kirisi yo Tool Mai kiidi i, in be yaru lodi mulumulu yong a tiyei dada dook mata pong, inbe tikaua lo silene kidi pong.

Di Tooltool Yo Tipatomonai Di Tooltool Ye Betanga Moolmool Tiap Nga

³Ngan dawa ben tina yo awete pong muku ye kene yo ayegong a be ala pang tana mai Masedonia ye in nga, ngan le awete pong mulu nen, be sila kuyepe la malala mai Epeses ngan. Ngan be sila kuyepe a be nen ngan kuwete le koom mede a kulele di tooltool ke kaplungunu a kin tipatomonai di tooltool ye betanga kidi yo moolmool tiap ngan mulu be. ⁴Inbe kuwete a kulele di kin titu ye urata ke bete sokoraingi yo taukan punu, inbe ye pitingi di rara kidi edi le mooloo mata be. Betanga yo nen ngan ke be iyei di tooltool a koodi parkap ye leu, bong ke be ilon di a tiyei urata ke Maro, ngan tiap. Ye dada yo be tayei urata ke Maro ye in nen, be tatara lodo medana panga leu. ⁵Ngan ye punu yo a le awete pong be kulele di ye i, in nen. Idi tooltool yo tatara lodo medana pang Kirisi nga, ngan be lodo pang di diede mai san. Ngan kumata le lodo be tayei so yo dook mata ngan leu, inbe tatoo dada dook mata yo lod wetewete ye be tatoo nga, inbe tatara lodo medana moolmool pang Kirisi nga, ngan ole lodo pang di diedi mai san. ⁶Bong di tooltool kapala ke kaplungunu tina ngan tikapsap ye dada dook mata yo nen nga, inbe la titoo bete sokoraingi yo taukan punu nga. ⁷Di ngan lodi be tiyei ben di tooltool ke

patomonaingi di tooltool ye ger ke Maro, bong di tapdi ngan lodi galanga dook ye betanga yo tiwete, ngan punu tiap. Inbe ye so tina yo tiwete le koodi mede ye a tipatomonai di tooltool ye nga, ngan di tapdi lodi galanga dook ye betanga kidi, ngan tiap lapau.

⁸Ngan idi tooltool yo ke Kirisi nga, ngan lod galanga nen, ger ke Maro yo ikap pang Mose nga, ngan ger dook mata. Le kumata be tool sa ipatomonai di tooltool ye ger tina ngan dook mata ben yo Maro ya taunu lono be ipatomonai di ye nga, ngan ole ger tina ngan iyei ben so dook mata pang di. ⁹Bong idi nga lod galanga lapau nen, ger ke Maro yo itar nga, ngan pang di tooltool yo noonoodi, ngan tiap. Bong ger tina ngan pang di tooltool yo tisak noonongoo a tilongo betanga tiap nga, inbe pang di tooltool yo titoo dada dook mata yo Maro lono be tattoo ngan tiap a tiyei noonoo mata nga, inbe pang di tooltool yo tiwala muridi pang dada dook mata le imot yo Maro lono be tattoo nga, inbe pang di tooltool yo lodi tar be sungunu in so sokorai nga, inbe pang di tooltool yo tiraumata di tamadi too di tinadi a timmata nga, inbe pang di tooltool yo tiraumata di diedi a timmata nga, ngan lapau. ¹⁰Inbe ger tina ngan pang di tooltool yo tiyei dada dook tiap ke bauk nga, inbe pang di tooltool yo tiyei dada dook tiap ben di tooltool ke Sodom le Gomora nga, inbe pang di tooltool yo tipinoo di tooltool kapala a man tiporo di ye urata nga. Inbe ger tina ngan pang di tooltool yo tiwete betanga kidi ngan moolmool tiap nga, inbe pang di tooltool yo tiwetewete ngan tillung a tiwete moolmool le ete be tipamede betanga kidi ye nga, inbe pang di tooltool yo tiyei dada dook tiap kapala yo be iraautoo betanga yo tarantatu nga, ngan lapau. ¹¹Ngan betanga tani, in ipa ye bingi dook mata yo Maro ikauu pau be aweteweta pang di tooltool i. Inbe bingi dook mata tani i, in iwetewete ye Maro yo iyei urata dook mata pang di tooltool ki i. Ngan ya in ene mai san ke be di tooltool tipayiti.

Lo Ponana Ke Paulu

¹²Le awete lo ponana kiau pang Yesu Kirisi yo Tool Mai kiidi i, in ye yo lon tarau ben au tool moolmool a le ipootau inbe ipamedau be ayei urata ke rangi bingi dook mata ki nga. ¹³Muku ngan akan paseme Yesu, inbe akap malmal a arau sokorai di tooltool yo titara lodi medana panga nga. Bong Tool Mai lon mulumulu yau, yesoo muku ngan atara lok medana pang Yesu tiap, le lok galanga ye urata dook tiap yo ayei, ngan tiap. ¹⁴Ngan la Tool Mai kiidi in lono pau a iyei dada dook mata nen kaiye pau nga. Ngan ye dada dook mata tani yo Yesu Kirisi iyeii pau i, in la atara lok medana panga, inbe lok pang di tooltool kapala mai san, ngan lapau i.

¹⁵Le betanga yo be aweta pong i, in betanga moolmool a kouu a kuparama le imede. Ngan betanga tani in nen; Yesu Kirisi isi tana be si

ikap di tooltool ke noonoo a ipamulu di ye so dook tiap yo be igarung di i. Ngan di tooltool tina, ngan atu yo illos di diene le imuku pang di ye yeingi dada dook tiap i, in la au i. ¹⁶Ngan ye punu yo a le Maro lon mulumulu yau, au tool dook tiap tani ke noonoo i, in nen a be nen ngan di tooltool tikamatau ben Yesu Kirisi, in katen malmal pau tarai tiap. Le di tooltool tina yo be titara lodi medana panga a be tiyepe ye yepongo dook mata yo taukan motingi in nga, ngan lodi galanga nen be ole iyei dada gaongo leu nen pang di lapau. ¹⁷Le tayitmaka Maro yo iyei tool kuto mai a matan kalidi le imot i. Ya in iyepe nen le taukan motingi, inbe ya in taukan matenge, inbe o ke be takamata ye matada tiap lapau. Ya taleu in la Maro i. Le tayitmaka ene inbe taye ne, “Maro, em mai san ke be di tooltool tipayitong le ikenen leu le taukan motingi.” Moolmool.

¹⁸Natuk Timoti, nga be awete a apamedong ye betanga tina yo muku ngan di tooltool tikaua Maro koonoo a tiwetewete yong nga. Nen le lom tut a kutoo, inbe kuparama le imede a be nen ngan kupatoko ye patokongo yo dook mata i. ¹⁹Ngan la kuparama lom medana yo kutaru pang Maro i, in le ipa ye dada dook mata yo lom wetewete ye be kutoo, in lapau. Ngan di tooltool kapala lodi pang dada dook mata yo lodi wetewete ye be titoo ngan tiap. Nen le tigarungu lo medana kidi yo titaru pang Yesu i, in le dook tiap dawa ben ookoo isauloko a imassoroko le dook tiap ki taunu nga. ²⁰Le di tooltool tina nga, ngan di diedi ru la Aimenias iye Aleksanda nga. Di suru tina ngan asuket di la Satan baene a be tisolo masngana a iso matadi, a be nen ngan tikan paseme Maro ye betanga dook tiap mulu be.

Dada Dook Mata Ke Pataraungu

2 ¹Timoti, nga be awete pong a apamaditi lom ye urata yo be kuye di diem, yo titara lodi medana pang Yesu nga, ngan kayeii le imuku pang urata kapala le imot, in nen. Kapatarau a kawete lo ponana kiang pang Maro, inbe katoru be ilon di tooltool nga le imot a iyei dada dook mata pang di. ²Inbe katoru be ilon di tooltool yo tiyei kuto maimai a matadi kala tana maimai nga, inbe ilon di tooltool yo titar di be matadi kalidi nga, a be nen ngan burungu le yepongo kiidi dook mata ke be tayepe ye lo silene dook mata, inbe tayepe dawa ben di tooltool yo Maro ipootoo di panga nga, inbe tatoo dada dook mata le imot yo Maro lono be tatoo nga. ³Ngan pataraungu yo nen nga, ngan dook mata, le Maro yo ipamulidi ye so dook tiap yo be igarungidi i, in lon ponana ye. ⁴Yesoo, lono be ipamulu di tooltool le imot, inbe lono be lodi galanga ye betanga ki yo moolmool i. ⁵Ngan awete nen, yesoo Maro ataleu la iyepe i, inbe tool ataleu la iyepe kataunu kiidi tooltool taye Maro a be ikarata lodo le la taye Maro tagaua mulu i. Ngan tool tani, in la Yesu Kirisi i, ⁶yo ya taunu iraia tinini be ilon di tooltool le imot a be nen ngan Maro iyemenai

di ye noonoo kidi be. Ngan iyei nen ye lal yo Maro itaru panga i, be nen a Maro ipatnaii paidi ben ya in lono be ikap di tooltool le imot a ipamulu di ye so dook tiap yo be igarung di i. ⁷Le ye punu tani i, in la le ipootau be ayei aposol inbe awetewete betanga ki pang di tooltool yo tipa ye rara kidi Yuda tiap nga, a be nen ngan apatomonai di ye betanga moolmool ki inbe ye dada yo be titara lodi medana panga ye i. Le nga allung tiap, nga awete moolmool ye yo Maro ipootau be ayei aposol nga.

⁸Ngan nanga, ye ni nangai yo be tigaua inbe tisung pang Maro ye in nga, ngan lok be di tamoto yo be tiyit baedi pang ete ye pataraungu nga, ngan ke be lodi kaua urata ye dada ke kate malmal le koo parkap inbe tipatarau, ngan tiap. Bong tipatarau ye lodi yo iken galangana nga.

Noonoongoo Pang Di Garup

⁹Le di garup lapau, ye kene yo be tilonlon a tipital wam le so kidi kapala be ilo tinidi nga, ngan lok be tikaara di le dook mata ye di tooltool matadi. Le be nen ngan titarkoo tinidi le dook, bong tikapye be tiyei di tamoto a titang ye di be. Inbe lok be tipirak kutodi raunu, too timoro tinidi le kutodi raunu ye so sallinene dawa ben matauu inbe ye so kapala yo tikaara ye pat yo ene gol, ngan be. Inbe lok be tilonlon ye so ke lonloningi yo tiyimi ngan pat ki lo ete mata, ngan be lapau. ¹⁰Bong dada dook mata be di garup yo tisung pang Maro ngan be timoro tinidi ye, in nen. Ole tiyei urata dook mata a tilon di diedi a be nen ngan iyei ben moro dook mata pang di.

¹¹Le di garup tina ngan ke be tiwetewete ye ni ke sungunu tiap, bong tiwur moonoombe a titar talngadi dook ye betanga ke Maro yo di kuto maimai ke bareme ke sungunu tiwete nga, a nen ngan tilongo betanga kidi a titoo. ¹²Nen le lok be amalum pang garup sa a ipatomonai di tamoto ye betanga ke Maro, too iyei kuto mai pang di ye bareme ke Maro, ngan tiap. Bong lok be di garup tina ngan tiyepe moonoombe. ¹³Ngan ye punu yo a le agunkala di garup ye urata yo nen nga, yesoo bong Maro ikarata Atam muku, motong la ikarata Ewa nga. ¹⁴Inbe Atam la ilongo Satan koonoo a itoo betanga ki, in tiap. Bong Ewa la Satan ikaua lungunu ye, ngan le ilongo koonoo a itoo, inbe iyeie dada dook tiap ke noonoo i. ¹⁵Bong kumata be di garup tiyepe dook ye nedi a tipasui di kakase nga, ngan ole Maro ilon di a ipamulu di ye so dook tiap yo be igarung di i. Le kumata be titara lodi medana panga le ikenen leu, inbe lodi pang di diedi mai san, inbe tiyepe dawa ben di tooltool yo Maro ipootoo di panga nga, inbe tiyei dada dook mata ye di tooltool matadi, ngan ole ipamulu di.

Di Kuto Maimai ke Bareme Ke Yesu

3 ¹Betanga yo tiweta in moolmool. Le betanga tani in nen, kumata tamoto sa lono be iyei tool kuto mai pang di tooltool yo tigaua ye

bareme ke Yesu nga, ngan tool tani in itara lono pang urata yo dook mata ngan leu. ²Ngan nanga, tool yo be iyei kuto mai pang bareme ke Yesu i, in tool la iyepe le yepongo ki dook mata le di tooltool tipuske touo busunu ki siap i, inbe tool la matana pang garup ataleu yo iyooloo koot i, inbe tool la ikan le iyin mata be i, inbe tool la ikaptutu dook ye yepongo ki i, inbe tool la itoo dada yo dook mata ye di tooltool matadi, inbe ya in ke be ikamata di lowo, inbe ya in tool dook mata ke be ipatomonai di tooltool ye betanga ke Maro lapau. ³Inbe tool tani in iyin ran medana mata le kuton moo ye tiap, inbe katen malmal a irau sokorai di tooltool tiap, bong iyepe le lono pusbe. Inbe tool tani in iye di tooltool tiparsu ye betebetanga tiap, inbe lono mai san pang pat ke yimoongoo so tiap lapau. ⁴Bong tool tani in matan kala rimana le di natunu le di rara ki yo iye di tiyepe ngan dook mata, inbe iyei di natunu tina a be nen ngan tiraua panga inbe titoo betanga yo iwete pang di ye nga le imot. ⁵Bong kumata le be tool tani in matan kala ya taunu rimana le di natunu ngan dook tiap nga, ngan o ke be matan kala di tooltool ke Maro yo tigaua ye bareme ke Yesu, ngan dook tiap lapau. ⁶Nen le tool yo nookoot yege iportaka lono a be itoo Yesu i, in ke be kataru a iyei kuto mai pang bareme ke Yesu tiap. Ole nen ngan itiki a ya taunu ipayiti ye urata ki yo iyei nga, ngan ole Maro iyemenaii ben tina yo be iyemenaiia tool kuto mai kidi so sadi in nga. Le tool yo iyepe nen i, in ya taleu la be iyei tool kuto mai pang di tooltool yo tigaua ye bareme ke Yesu nga.

⁷Ngan la tool yo be ikaua urata nen i, in ke be di tooltool yo tigaua ye bareme ke Yesu tiap nga, ngan tikamata ben ya in tool dook mata. Ole nen ngan tigarungu ye betanga dook tiap, ngan ole lo itingi ye dowo ke tool kuto mai kidi so sadi.

Di Tooltool Yo Tiyei Suanga Pang Bareme Ke Yesu Nga

⁸Ngan gaongo leu, di tamoto yo be tiyei suanga a be tilon di tooltool yo tigaua ye bareme ke Yesu nga, ngan be titoo dada yo dook mata ngan ye di tooltool matadi. Bong ke be tiwete pang di tooltool ngan medi ru ye betanga kidi tiap, inbe ke be tiyin ran medana mata a kutodi moo ye tiap, inbe ke be tillung di tooltool a tikap sokorai pat kidi tiap lapau. ⁹Bong betanga moolmool ke Maro yo ipatnaii paidi i, in tiparama le imede inbe tigaua lodi le imot be titoo. Muku ngan betanga tani in iken sollono, bong nookoot nga lod galanga ye. ¹⁰Le di tooltool yo be katar di nga, ngan katouo di muku ye urata a kakamata di ngan. Le kumata be tiyei urata dook mata le kapuske touo busunu kidi siap nga, ngan la be katar di a tiyei suanga pang di tooltool yo tigaua ye bareme ke Yesu nga.

¹¹Ngan gaongo leu, di tooltool tina be tiyei suanga nga, ngan di rimadi ngan be titoo dada yo dook mata ngan ye di tooltool matadi. Bong di ngan ke be tiwete mur ye di tooltool tiap, inbe di ngan ke be tikan le

tiyin mata tiap. Bong tiwete betanga kidi nga, ngan titoo le imot le lo itar kanono moolmool.

¹²Le di tooltool yo be tiyei suanga pang bareme ke Yesu nga, ngan ole matadi pang di garup tina yo tiyooloo di koot, ngan leu, inbe matadi kala di rimadi le di natudi le di tooltool kidi yo tiye di tiyepe nga, ngan dook mata. ¹³Di tooltool tina yo tiyei urata dook mata nga, ngan ole di tooltool tipayit di ye dada dook mata kidi yo tiyei nga. Nen le titattadai tiap, bong ole tikodo le timede a tiwete pang di tooltool ye lodi medana yo titaru pang Yesu Kirisi i.

Betanga Moolmool

¹⁴Timoti, lok be amala palbe pang yong. Bong awodo betanga tina ilo ye rau i pong, ¹⁵a be nen ngan kumata be atu ye so sa le amala tarai tiap nga, ngan ole betanga tina ipagalanga lom ye dada dook mata yo be idi tooltool yo tagaua ye bareme ke Maro koot, ngan tatoo nga. Ngan idi tooltool yo tatara lodo medana panga nga, ngan bareme ke Maro yo iyepe nen le taukan matenge i. Nen le idi nga dawa ben sau medana yo tipe a itoko rumu i, yesoo ye lodo medana yo tataru panga i, in taparama betanga tani yo moolmool in le imede. ¹⁶Le moolmool, Maro ipatnai dada dook mata yo lono be tatoo ngan paidi. Muku ngan betanga tani in iken sollono, bong nookoot nga lod galanga ye nen:

Yesu in iyei tool moolmool a pombe mallangana.

Inbe Maro Amunu Silene ipatnaii paidi ben ya in Maro natunu.

Di bangabangana ke Maro tikamata.

Inbe di tooltool tikaua betanga ki a tiweteweta pang di tooltool ke ni mai i le imot.

Le di tooltool ke tana i ngan alunu kaiye la titara lodi medana panga nga.

Motong la Maro ikauu a ilo pang malala ki, a be nen ngan iyeie ene le ilo ete ke be di tooltool tipayiti.

Di Tooltool Kapala Ole Tillung Di Tooltool Ye Patomonaingi Kidi

4 ¹Maro Amunu Silene iwete betanga galangana nen be ke tina yo nookoot tayepe ye nga le ilo ye lal yo be Yesu imulu a isi ye in nga, ngan ole di tooltool kapala tiwala muridi pang Maro a tiyege lodi medana yo titaru panga i. Inbe la titar talngadi ye betanga le patomonaingi ke di so sadi yo ke kaplungunu nga, a la titoo betanga tina yo di tooltool ke kaplungunu ngan tipatomonai di ye nga. ²Patomonaingi yo nen nga, ngan ipa ye di tooltool ke kaplungunu yo tiwete pang di tooltool, ngan medi ru ye betanga kidi a tillung di ye nga. Ngan di tooltool yo nen nga, ngan lodi matamata le ke be lodi galanga a tiyetai ye yo tikapsap ye dada dook mata yo lod wetewete be tatoo, ngan tiap. ³Nen le di tooltool ke

kaplungunu tina, ngan tigunkala di tooltool ye kerenge, inbe tigunkala di lapau ye so kapala yo ke kaningi nga. Bong so tina nga, ngan Maro itar paidi, idi tooltool yo tatara lodo medana pang Yesu inbe lod galanga ye betanga moolmool ki nga, ngan be takap inbe tawete lo ponana kiidi panga ye. ⁴Ngan nanga, so le imot yo Maro itar nga, ngan dook mata. Le kumata be takap inbe tawete lo ponana kiidi panga ye nga, ngan ke be tawili sa a ila diki, ngan tiap. ⁵Yesoo, betanga ke Maro iwete be so yo nen ngan dook mata le imot. Inbe pataraungu kiidi ngan iyeyi le dook mata lapau.

Noonoongoo Dook Mata Pang Timoti

⁶Le kuwete a kupamadit di diede kapala yo titara lodi medana pang Yesu ngan lodi ye noonoongoo tina yo akap pong nga. Kumata le be kuyeyi nen nga, ngan ole kuyeyi ben ong in kapraingi dook mata ke Yesu Kirisi. Inbe Maro ole ipamedong ye betanga moolmool yo tatara lodo medana ye i, inbe ye patomonaingi dook mata yo kutoo nga. ⁷Nen le lok be kuwala murim pang bete sokoraingi yo taukan punu nga. Betanga yo nen nga, ngan itoo dada dook mata yo Maro lono be tatoo, ngan tiap. Bong kutouotou ong ye dada dook mata le imot yo lono be tatoo nga. ⁸Ngan yo a le awete pong be ong taum kutouotou ong ye nga, yesoo lom galanga ye dada yo be idi taudu tatouotou idi ye urata yo ke tana i, in so ke be ilonidi ye yepongo kidi ke tana i leu. Bong be idi taudu tatouotou idi ye dada dook mata yo Maro lono be tatoo i, in la dada dook mata ke be ilonidi ye yepongo kiidi yo nookoot tayepe ye katai i, inbe ye yepongo kiidi yo ke pang dama ni, in lapau. ⁹Ngan betanga tani, in betanga moolmool le ke be di tooltool tikauu a tiparama le imede. ¹⁰Ngan la le idi nga tayepe urata mai san be tatoo betanga tani, yesoo tatara lodo le atu pang Maro yo iyeyi nen le taukan matenge i. Ngan Maro in tool tani yo iyeyi dada dook mata pang di tooltool le imot i. Bong di tooltool yo titara lodi medana panga moolmool nga, ngan di leu la be ikap di a ipamulu di nga.

¹¹Ngan la kuwete le koom mede ye betanga tina ngan pang di tooltool, inbe kupatomonai di ye. ¹²Bong Timoti, ole di tooltool tikamatong ngan matadi ru ong, yesoo ong in tool kase paunu mata. Bong be nen ngan ole koptutong dook ye di tooltool yo titara lodi medana pang Yesu nga a be tikamatong, ngan titoo ong ye betebetanga le ye yepongo kiong, le ye lom yo mai san pang di tooltool le imot i, le ye lom medana yo kutaru pang Maro i, inbe ye dada yo kuyeyi le taukam busunu ye Maro matana i.

¹³Nen le ye kene yo be amala pang yong tarai tiap nga, ngan kuraia lom le imot inbe kuyeyi urata kiong ke kinkatingi betanga ke Maro yo iken ye rau nga, ngan pang di tooltool a kuwetewete bingi dook mata ki pang di, inbe kupatomonai di ye. ¹⁴Le kin kotte so dook mata yo Maro ikauu pong

ye lo ponana ki, in be. Ngan so tani in di kuto maimai ke di tooltool yo tigaua ye bareme ke Yesu nga, ngan tikaua Maro koonoo a tiweta pong ye kene yo tipaloko baedi lo kutom a tipatarau yong ye i.

¹⁵Le ong taum kuraia lom le imot a kutoo betanga tina yo nga, a be nen ngan di tooltool le imot tikamatong ben nookoot nga kutara lom le imede, inbe kusootoo yeingi urata yo Maro lono be kuyei nga. ¹⁶Kin koptyutong dook ye yepongo kiong inbe ye betanga kiong yo kupatomonai di tooltool ye nga. Nen le kuyei urata tina yo nga le ikenen leu, yesoo kumata le be kuyei nen nga, ngan ole Maro ipamulong kuye di tooltool yo titar talngadi a tilongo betanga kiong nga ye so dook tiap yo be igarungang i.

**Dada Yo Be Matam Kala Di Tooltool Yo Titara
Lodi Medana Pang Yesu Nga**

5 ¹Ye kene yo be kuwete pang tool tamoto yo maiyoko a kulele ye dada dook tiap ki yo iyei nga, ngan kin kuwete katkat a kupasak panga be. Bong ole kuwete betanga mos panga dawa ben yo kuwete pang tamam nga. Inbe kuyei dada dook mata pang di tamoto yo kakase paunu, ngan dawa ben yo kuyei pang di toom le taim nga. ²Inbe kuyei dada dook mata pang di garup yo maimai nga, ngan dawa ben yo kuyei pang tinam nga. Inbe kuyei dada dook mata pang di garup yo kakase paunu ngan lapau, dawa ben yo kuyei pang di lim nga. Le kuyei dada dook mata leu pang di garup kakase paunu tina, a be nen ngan kuyepe le taukam busunu ye Maro matana.

³Le kumata be garup iyei tap a ya taleu iyepe le tool sa iloni tiap nga, ngan lok be kuloni a matam kala dook. ⁴Bong kumata le be garup tap atu be di natunu too di tiunu tiyepe nga, ngan ole titoo dada dook mata ke Maro muku pang sokadi tani yo iyei tap i. A be nen ngan tirau urata kootoonoo kidi tinadi le tiudi ye urata kidi yo muku ngan tiyei ye di nga. Ngan dada dook mata yo nen, ngan la Maro lon ponana ye nga. ⁵Ngan garup tap moolmool i, in tap la ya taleu iyepe le tool sa ke be iloni tiap i. Nen le itara lono le atu pang Maro, inbe ipatarau ye ke le bong tina yo kanakana ngan a itoru be iloni. ⁶Bong kumata be garup tap yo iyepe ngan iyei dada dook tiap yo lono be iyei a lono ponana ye i, in ole iyepe le dawa ben tool matene ye Maro matana. ⁷Le betanga tina nga, ngan ole kuwete pang di tooltool yo tigaua ye bareme ke Yesu ngan lapau, a be nen ngan tool sa o ke be iwete mur ye di tiap. ⁸Nen le kumata be tool sa ilon di rara ki dook tiap nga, inbe ilono ya taunu tinana too tiunu garup dook tiap lapau nga, ngan tool tani in iwala murini pang lono medana yo itaru pang Maro i. Le dada dook tiap ki yo iyei nen i, in le illos dada dook tiap kidi tooltool yo ke Kirisi tiap ngan tiyei nga.

⁹Nga be awete nin di garup tap yo be kuwodo edi ilo ye rau a be kalon di nga, ngan kumata di tap la rai kidi sangaul limi be atu inbe ilo pang ete

nga. Inbe tap la matana pang ye tamoto ataleu tani yo iyooloo koot i ye kene yo imata tiao nga. ¹⁰Inbe kumata garup tap la di tooltool tikamata ngan tipayiti ye dada dook mata ki yo iyei nga, ngan ben yo matan kala di natunu dook mata nga, inbe yo ikamata di lowo nga, inbe yo ingas di tooltool ke Kirisi kedi nga, inbe yo ilon di tooltool yo tisolo urata moonoo nga, inbe ye yo iraia lono be iyei urata dook mata le imot pang di tooltool nga. Ngan di garup yo tiyei dada dook mata nen nga, ngan di leu la be kuwodo edi ilo ye rau nga. ¹¹Bong kin kuwodo di garup tap yo tinidi paunu, ngan edi ilo ye rau be. Ngan kumata be kuwodo edi lo ye rau, lo ngan be tinidi iyolo pang di mulu be tikere nga, ngan ole tigarungu betanga yo tipamede a iken kataunu kidi tiye Kirisi i. ¹²Le ye dada kidi yo tiyei nen nga, ngan ole di tapdi titar di tilo ye Maro baene be iyemenai di ye yo tillung a tipamede betanga pang Kirisi, motong tidada betanga kidi tani yo tipamede muku, in pono nga. ¹³Inbe tiyei nen leu tiap, bong tinidi booroomoo a tiyepe le ngan tipa a tila ye rumu ke tool in, le ngan tila ye san a matadi so di tooltool ke rumu tina ngan. Ngan tinidi booroomoo a tiyei nen leu tiap, bong ole tiwete mur ye di diedi, inbe tiyei kalakala di tooltool ye urata kidi yo tiyei nga, inbe tiwete pang di ye betanga yo ke be tiwete tiap nga. ¹⁴Ngan ye dada yo nen nga, ngan la le akap betanga pang di garup tap yo tinidi paunu go nga, ngan be tikere mulu a tipasui di natudi, inbe tiyei dada dook mata yo be matadi kala di niditooroo le di natudi ye nga. Kumata be tiyei nen nga, ngan la be di koi kiidi tikamata so sa yo dook tiap ke be tiwete mur yidi ye, ngan tiap nga. ¹⁵Ngan yo a le awete pong nen nga, yesoo di garup tap tina nga, ngan kapala tiwala muridi pang dada dook mata, inbe la titoo dada dook tiap yo ke Satan nga.

¹⁶Ngan nanga, kumata garup atu yo itara lono medana pang Kirisi, in be di sokana tiyei tap nga, ngan ya taunu la be ilon di i, a be nen ngan di tooltool yo tigaua ye bareme ke Yesu ngan ke be tilon di, ngan tiap. Bong be nen ngan tilon di garup tap kapala yo di leu tiyepe le taukadi tooltool yo be tilon di nga.

Di Kuto Maimai Ke Bareme Ke Yesu

¹⁷Ang di tooltool yo katara lomim medana pang Yesu nga, kakamata di kuto maimai kiang yo tiyei urata a matadi kalang dook mata nga, ngan karaua pang di, inbe kakap pat le so kapala yo be kalon di ye nga. Nen le di tooltool yo tiwetewete bingi dook mata ke Maro pang a tipatomonai ang ye nga, ngan la be kalon di dook mata nga. ¹⁸Ngan awete nen, yesoo betanga yo iken ye Rau ke Maro i, in iwete nen, “Ye kene yo be kakap urata pang bulumakau kiang a ipa be iyirngan dingding patunu ngan kulini du tana nga, ngan kin kupaukala koonoo a ikan so tiap ngan be.”^a

^a 5:18 Ger 25:4

Inbe Rau ke Maro iwete nen lapau, “Kumata le be tool iyei urata nga, ngan la be ikap so ye urata kootoonoo ki nga.”^b ¹⁹Ngan kumata le tool atu iwete be di kuto maimai kiang tina ngan atu be iyeie dada dook tiap ke noonoo nga, ngan kin kulongo betanga ki be. Bong be nen ngan tool ru too tol tiwete pong ye betanga tina yo nen nga, ngan la be kulongo betanga kidi nga. ²⁰Nen le di kuto maimai kiang tina ngan sa be ikapsap ye dada yo dook tiap ke noonoo nga, ngan ole kugaua di tooltool yo tigaua ye bareme ke Yesu nga, inbe kuwete panga a kulele ye dada dook tiap ki yo iyei nga, ngan mallangana, a be nen ngan di diene kapala be tikamata ye matadi, ngan titattadai, ngan o ke be tiyei dada dook tiap yo ke noonoo, ngan tiap.

²¹Timoti, nga be awete betanga medana pong ye Maro iye Yesu Kirisi, inbe ye di bangabangana ke Maro yo ipootoo di panga nga, ngan matadi nen, be kutoo betanga kiau tina yo apatomonai ong ye nga, ngan dook le imot. Ngan nanga, ole kuyeie dada gaongo leu pang di tooltool le imot, bong ke be kuyeie dada atu pang di kuto maimai, inbe san pang di tooltool yo sokorai ngan be.

²²Kin katem ro ye tool yo be kataru a iyei kuto mai pang di tooltool yo tigaua ye bareme ke Yesu i, in a kupaloko baem lo kutono a kupatarau ye palbe be. Ngan kumata be kuyeie nen le kuto mai tani, in be iyeie dada dook tiap sa ke noonoo nga, ngan noonoo ki tani ole man irookong. Le be nen nga, ngan ong taum koptyutong dook a kuyepe le taukam busunu ye Maro matana.

²³Timoti, kin kuyin ran sokorai leu be, bong kuyin ooroo wain surunu ngan kasin lapau, a be nen ngan ikarata kapom lono a igiri matamatenge yo iken kapom lono a ipulke ong mata i.

²⁴Di tooltool kapala ngan be tiyei dada dook tiap ke noonoo nga, ngan ole dada dook tiap kidi tina, ngan ise pombe mallangana a takamata ye matada. Inbe bingi ke noonoo kidi tina, ngan ole imuku pang ye ni ke karatanga betanga. Bong di tooltool kapala ngan dada dook tiap kidi ke noonoo yo tiyei nga, ngan iken sollono a tayepe kasin lo ngan be ise pombe mallangana a takamata ye matada. ²⁵Ngan nen le gaongo leu, di tooltool ngan be tiyei dada dook mata nga, ngan ole dada dook mata kidi tina, ngan se pombe mallangana a takamata ye matada. Inbe dada dook mata kapala yo di tooltool tiyei nga, ngan o se pombe mallangana tarai tiap, bong ke be iken sollono le iken so tiap. Ngan nen le kin katem ro ye tool yo be kataru a iyei kuto mai pang di tooltool yo tigaua ye bareme ke Yesu in be.

Noonongoo Pang Tool Yo Iyei Urata Ben Tool Ke Poranga I

6 ¹Di tooltool ke Kirisi yo tiyei urata ben di poranga nga, ngan kin tikamata di kuto maimai kidi nga ben di ngan tooltool dook mata

^b 5:18 Luka 10:7

ke be tiraua pang di a titoo betanga kidi le imot. Le kumata be tiyei nen nga, ngan o ke be di tooltool tiwete mur ye Maro, too ye patomonaingi kiidi, ngan tiap. ²Nen le kumata be di kuto maimai kidi ngan di tooltool ke Kirisi lapau nga, ngan ke be lodi kau urata nen be nga di diedi a be nen ngan tiraua pang di a titoo betanga kidi tiap, ngan tiap. Bong be nen ngan di tooltool tina yo tiyei urata ben poranga nga, ngan tiyei urata dook mata yo be tilon di ye nga, yesoo di ngan tooltool ke Kirisi yo ke be lodi pang di mai san nga. Le betanga yo be kupatomonai di tooltool tina ye a kupamede di be titoo, ngan nen.

Tool Yo Matana Pat Mata I

³Kumata le be tool sa lono pang betanga tarantatu ke Tool Mai kiidi Yesu Kirisi a ipatomonai di ye dada dook mata le imot yo Maro lono be titoo, ngan tiap, inbe la ipatomonai di tooltool ye betanga yo moolmool tiap nga, ⁴ngan tool in iyitmaka ya taunu ene ye leu, bong mala be lon galanga kasin pa ye so yo iwetewete ye, ngan pitiap yege. Le tool yo iyei nen i, in so ben matamatenge dook tiap la iken kutono lono i. Nen le iso pang bete sokoraingi pang di diene a iye di koodi parkap, inbe iye di diene tiparsu ye betanga. Ngan nen le iyei di tooltool a matadi gorengana ye so kidi tooltool kapala a lodi dook tiap pang di, inbe tiwete betanga yo ke kate malmal nga, inbe tipasa mur ye di diedi a tigarung di ye betanga, inbe lodi tar di diedi be tiyei dada dook tiap, ⁵inbe kanakana ngan ole tiwetewete betanga yo ke kate malmal ngan pang di diedi kapala lapau. Ngan tiyei nen, yesoo di tooltool tina ngan kutodi le lodi dook tiap le lodi galanga ye so yo dook mata too dook tiap, ngan tiap. Bong di ngan lodi galanga ye betanga moolmool pitiap yege. Inbe lodi tar nen, kumata be tipatomonai di tooltool ye dada ke Maro nga, ngan ole tikap so alunu yo be ballingadi ye nga.

⁶Bong kumata be tool atu itoo dada dook mata le imot yo Maro lono be tatoo nga, inbe ikamata so ki ya taunu yo ikap a iken ye, ngan le lon wete be so tina ngan iye le imot panga nga, ngan ole tool tani in ballingana ye so ke Maro. ⁷Ngan awete nen, yesoo ye kene yo tinada tipasui idi a tasi tana ye in nga, ngan takaua so sa a tapa ye a tasi, ngan tiap. Ngan nanga, kumata le be tammata nga, ngan o ke be takaua so sa ke tana i a tapa ye a talo ngan tiap lapau. ⁸Bong kumata be takap so ke kaningi inbe so ke lonloningi nga le takamata ngan iye idi koot nga, ngan ole lod ponana ye kaiye. ⁹Ngan nen le di tooltool yo lodi be tikap pat le so matana matana a tigaua le alunu a be ballingadi ye nga, ngan ole touanga alunu la be pombe pang ye di nga, le ole ikap di a tilo dowo lono ke tool dook tiap dawa ben di asara yo lo titingi ye dowo nga. Ngan ye yo matadi pat le so matana matana ke tana a be ballingadi ye nga, le tiyei kapa a di tapdi tigarung di le tilledi dawa ben ookoo imere a idaudar du tiek lono nga.

¹⁰Ngan ye yo awete pong nen nga, yesoo dada yo ke be di tooltool lodi mai san pang pat ke yimoongoo so ye i, in dada dook tiap yo matana matana nga, ngan punu igaua le imot a iken ye. Nen le di tooltool kapala yo matadi pat mata nga, ngan tiwala muridi pang lodi medana yo titaru pang Maro i, inbe di tapdi tigarung di a tisol masngana mai dawa ben tool ikurumu ye pul a isolo masngana mai san i.

Patokongo Dook Mata

¹¹Bong Timoti, ong in tool ke Maro, le kuwala murim a kuyepe manga mooloo ye dada dook tiap yo nen nga. Inbe kutoo dada dook mata yo noonoonoo ke Maro nga, inbe kutoo dada dook mata le imot yo lono be tattoo nga, inbe kutara lom le imede panga, inbe lom pang di diem kapala mai san, inbe kukodo le tutube a kusolo urata moonoo yo be pombe pang yong nga, inbe kuyepe le lom pusbe dook mata. ¹²Nen le kutara lom le imede pang Kirisi a be nen ngan kupatoko ye patokongo yo dook mata i. Le kuparama lom medana yo kutaru i, ngan ole kuyepe ye yepongo dook mata yo iken le taukan motingi i. Yesoo bong, kulkulunu ngan Maro ikiu ong be kouo yepongo dook mata tani, in ye kene yo lo kukodo dama ke di tooltool, inbe kuwete lom a kupaposo lom medana yo kutaru pang Maro in nga.

¹³Timoti, ye Maro yo itar so nga le imot a tiyepe mauredi, in matana, inbe ye Yesu Kirisi yo lo ikodo dama ke Pontius Pailot a iwete betanga moolmool a ya taunu ipaposi panga, in matana nga, ngan awete betanga medana pong nen, ¹⁴betanga ke Maro yo kop koot nga, ngan kin kuparama le imede a kutoo dook le imot, ngan o ke be tool sa iwete pong ye tiap. Nen le kukodo le kumede ye betanga tani le lo ye lal yo be Tool Mai kiidi Yesu Kirisi imulu a isi pombe mallangana ye i. ¹⁵Ngan ye kene tani in ole Maro iwanga Yesu a isi ye lal tani yo itaru panga i. Le Maro yo iyei urata dook mata pang di tooltool le tiyitmak ene i, in ya taleu la iyei kuto mai i. Ya in kuto mai ke di kuto maimai kapala yo matadi kala tana maimai nga. Inbe ya in iyei Tool Mai pang di tooltool maimai kapala, ngan lapau. ¹⁶Inbe Maro ya taleu, in taukan matenge, inbe ya in iyepe ye sul loloana somai le ke be di tooltool tila potai ye tiap. Nen le tool sa ikamata toua pitiao, inbe tool sa ke be ikamata tiap lapau. Le be nen ngan tayitmake ene inbe taye ne, “Maro, gurana kiong mai san ke be di tooltool tipayitong ye le ikenen leu.” Moolmool.

Noonoongoo Pang Di Tooltool Ballingadi

¹⁷Au lok be kuwete pang di tooltool ke Kirisi yo ballingadi ye so ke tana i nga, ngan kin tiyitmak di be. Inbe kin titara lodi le atu ye so kidi ke tana i nga be ole ilon di ye yepongo kidi, ngan be. Yesoo, so tina yo ngan ole iken le mos tiap, inbe ilene palbe leu. Bong be nen ngan titara

lodi le atu pang Maro yo ilonidi mai san a ikap so le imot paidi a be lod ponana ye i. ¹⁸Inbe kuwete pang di tooltool tina yo ballingadi ngan be tiyei dada yo dook mata ngan le alunu pang di tooltool. Le kuwete pang di a tiyei ben tool ke maroro a tipoto so kidi tina, lo ngan be tikap kapala pang di diedi. ¹⁹Kumata le be tiyei nen nga, ngan ben tigaua balingi pang di tapdi a be ilon di ye yepongo kidi yo pang dama ni i. Le ole tikaua yepongo dook mata moolmool yo iken le taukan motingi i.

²⁰Timoti, kin matam kala urata tani yo Maro ikauu pong i, in dook. Inbe ole kuwala murim pang betanga sokorai yo itoo dada dook mata yo Maro lono be tatoo tiap nga. Inbe kuwala murim pang di tooltool yo tikapye be tiraautoo patomonaingi kiidi ye betanga yo tiwete ngan tillung be itoo dada dook mata ke lo galanga nga, ngan lapau. ²¹Ngan yo a le awete nen nga, yesoo di tooltool kapala titara lodi ye betanga kidi. Ngan tiyei dada nen le tiwala muridi pang lodi medana yo titaru pang Maro i.

Maro lono pang a iyei dada dook mata pang ang le imot.